

Celebracion grandi di Fundashon Cultural Kadushi

ORANJESTAD - Fundashon Cultural Kadushi ta participa cu dia 1 di october lo tin nan prome evento pa promove nos cultura y asina trata di mantene y traspasa nos herencia cultural pa nos hobennan. Luna pasa, pa ta exacto dia 11 augustus 2011 fundacion aki a ser funda y ya caba lo tin su prome grandioso actividad cultural. Dia 1 di october na Sportboys Club Angochi Sta Cruz lo tin varios presentacion di nos musica tipico y bailabel tambe combina cu un ceremonia pa homenagia algun di nos hendenan grandi di Santa Cruz cu a aporta na e herencia cultural den diferente forma. Tin cunukero, piscado, pareha bailado di Dera Gai pa mas di 40 aña, promotor tipico, musico, entre otro. Tambe lo tin gruponan di baile y pa garantis e exito di e dia aki, lo tin un intercambio cultural riba tereno musical. Lo ta na Aruba directamente for di isla ruman Boneiro e agrupacion "Tuttie Fruttie", kendenan no ta desconoci pa nan bunita presentacionnan cu ta un encanto pa mira y scucha cu nan trahenan tipico manera di antes. Nan ta preparando hopi bon pa

bin celebra nan di 18 aña di existencia na Aruba y mas cu claro Wewe tambe lo tey. Hopi Arubiano cu tur aña ta bula bay pa Dia di Rincon sa ken nan ta. Nan ta presenta na islanan bisiña y Hulanda y awor pa prome biaha na Aruba bou invitacion di agrupacion T.A.K.L.A. pa asina cera conoci cu un tiki di nan tradicion tambe. Ta invita henter e pueblo Boneriano na Aruba pa bin celebra e dia aki, anto e cabayero cu TAKLA a corona como e gai gai di Rincon april ultimo, Oes tambe lo tey cu su tremendo show di baile un ta coi perde.

Tambe nos agrupacion y tipiconan di Aruba lo tey, manera Robert Thiel riba wiel, Tico y su streanan Mochai, Tipico Alegre Kadushi Largo Aruba (T.A.K.L.A), Sodo y Cuero, Rincon Boyz, Tipico Los Amigos. Sigur lo no falta e Caha di Orgel. Lo tin diferente tent cu obra di man traha na Aruba y varios otro articulo manera pintura, biña y sigur e cosnan dushi.

Pa haci e intercambio cultural aki mas grandi ainda, tin 2 cushina, un cu platonan netamente di Aruba y un cushina netamente di

Boneiro. Mama Mel mes di Rincon lo bin pa sigura cu e kokinan cushina mescos cu di berdad e pan cu jorky. No por keda afo, esaki ta e oportunidad unico pa bin gosa e diasabra 1 di october na Sport Boys. E evento cultural lo cuminsa pa 12'or di merdia cu benta di cuminda y lo termina pa 1or di marduga cu un grupo musica bailabel local cu lo keda pa sorpresa y e miho ta no mester paga pa drenta pero nos ta bende rifa nan pa yega na fondo pa cubri nos gasto nan involvi. Pues cu compra di un rifa cu lo no ta mas cu 5 florin bo ta aporta 100% na nos cultura y chens pa gana premio.

Fundashon Cultural Kadushi ta invita henter pueblo di Aruba pa bin gosa y celebra diasabra 1 di oktober hunto cu nan pa gosa di nos balor cultural y un tiki di Boneiro tambe!

Fundadonan di e fundacion ta Presidente Andres Werleman (Modechi), Vice Presidente Ruben Krozendijk, tesorero Raynold Kelly, Jaime Lacle secretario, comisario y secretario suplente Erwin Rasmijn. Por tumar contacto cu nan na 593-1139, 562-2384, 594-9345, 594-0006, 735-1155. □